

04/07/1998

Mahathir kesal sikap media tempatan

Faizal Fadzil

KUALA LUMPUR, Jumaat - Datuk Seri Dr Mahathir Mohamad kesal dengan sikap media tempatan yang lebih cenderung membuat laporan negatif, seperti memperbesarkan masalah yang berlaku di Lapangan Terbang Antarabangsa Kuala Lumpur (KLIA), Sepang.

Perdana Menteri berkata, media di negara ini jarang menolong kerajaan mengatasi masalah yang dihadapi negara, sebaliknya lebih gemar melaporkan berita negatif untuk melariskan akhbar.

"Kita mempunyai akhbar dalam Malaysia ni... tapi mereka jarang menolong kita. Dia lebih seronok nak kecam kerajaan. Kalau kita kata apa-apa, ini akan dilaporkan secara negatif.

"Saya berasa amat sedih kerana sepatutnya akhbar kita menolong kita mengatasi masalah tetapi mereka lebih mirip untuk menjual surat khabar mereka dan membuat laporan negatif terhadap segala-galanya.

"Apabila KLIA dibuka, ada masalah, yang itu dibesar-besarkan, sedangkan ada lapangan terbang di Amerika apabila dibuka ia tak boleh berfungsi sama sekali, tak boleh nak dapat beg, semuanya hilang.

"Tapi di Malaysia kalau jadi macam tu, dia lapor bukan main lagi... yang kita buat kejayaan, tidak ada laporan langsung. Jadi, ini tidak menolong pemulihan negara kita," katanya ketika berucap di majlis penyampaian Anugerah Khidmat Cemerlang 1997 Jabatan Perdana Menteri di sini, hari ini.

Rabu lalu, beberapa akhbar di negara ini melaporkan mengenai keadaan KLIA yang memulakan operasi pertamanya Selasa lalu dalam keadaan kelam kabut apabila Sistem Memproses Pemeriksaan Daftar Masuk (PCPS) dan Sistem Pengendalian Bagasi Penumpang (BHS) tidak berfungsi.

Perdana Menteri juga menyelar sikap media yang berpendirian negatif terhadap tindakan kerajaan menubuhkan dana untuk membantu golongan usahawan.

"Kalau kita buat dana untuk tolong peniaga, dia tanya ini nak tolong orang tu ke... orang tertentu disebutkan.

"Jadi kita buat peruntukan berbilion ringgit pasal nak tolong satu orang. Jadi negatif pendapat mereka... jadi ini tidak menolong untuk mengatasi masalah," katanya.

(END)